



Múte Bourup Egede tale ved åbningen af Inatsisartuts efterårssamling

Taler

Múte Bourup Egede
Formand for Naalakkersuisut

Dato

22. september 2023

Sted

Inatsisartut, Nuuk, Grønland

Ataqqinartoq Inatsisartut siulittaasuat, ataqqinartut Inatsisartunut ilaasortat, ataqqinartut innuttaasut tamassi.

Kalaallit Nunatsinni innuttaasut 56.600 missaanniittut sinnerlugit maaniippugut. Maaniippugut innuttaasut sullinniarlugit. Sullinniarlugit sukataassaagut. Sukataassaagut suliassaqaratta.

Siumut isigaluta ingerlassaagut.
Naleqqanik toraagaqarluta ingerlassaagut.
Nunarput demokratiskiusumik ingerlatissavarput.
Inuit qanimut atassuteqarfigissavagut.
Attaviitsut ingerlaqatigissavagut.
Inuit Ataqatigiississavagut.

Tassa suliassatta pingaarnersaat, neriuppungalu maani inersuarmit sapinngisamik politikikkikut siammasissumik suleqatigiilluta aalajangertarumaartugut.

Angusassarpummi pingarneq tassaavoq innuttaasunik nunatsinnillu sullissilluarnissarput.

Unammilligassaqaqaagut, taamaattorli siunnerfippu angusariaqarparput, tassaasoq:

Nunarput atugarissarfiusoq.
Nunarput toqqissisimaffiusoq.
Nunarput ineriartorfiusoq.

--

Qinigaaffitta affaanut killippugut – ukiullu marluk ingerlaneranni angusagut amerlaqaat – sulilu anguniagassaqarpugut. Innuttaasut atugarissaarnerulernissaat nunattalu ineriartornissaa anguniarlugu sukataassaagut.

--

Sukataarutissagut suuppat? Inuunerup siunertaa suua? Pilluarneq ilinnut suua? Toqqissisimaneq ilinnut qanoq isumaqarpa? Uannut pingaarnerpaavoq inuttut aamma qamuuna ilukkut toqqissisimaneq.

Anguniagassarput tassaavoq inuiaqatigiit tamatta toqqissisimasumik inuuneqarnissarput.

Ulloq makiffiusoq toqqissisimanartoq.

Unnuk innarfiusoq toqqissisimanartoq.

Toqqissisimaneq assigiinngitsutigut anguneqarsinnaavoq.

Angerlarsimaffeqarnikkut, suliffeqarnikkut, ilaquataqarnikkut, kammaqarnikkut, tarnikkut, ikioqatigiinnikkut ilinniarnikkulluunniit.

Inuit tamatta assigiinnginnatta toqqissisimalersitsisartut assigiinngiiaarput.

Toqqissisimanikkummi inuttut ineriartorneq toqqammavilerneqarluartarmat nunatsinni inuiattut toqqissisimanissarput taamaammat pingaaruteqarpoq.

--

Nunatsinni inunngortut ukioq kingulleq 746-upput. Sorsunnersuullu aappaata kingorna inunngortut aatsaat taamak ikitsigisutut taaneqarsinnaapput.

Inuiattut meeqqanik pingaartitsiuartuuvugut.

Meerannguit inunngortut asanninnermik toqqissisimanermillu tunisassaraagut.

Qujanartumik ilaqutariit amerlanerpaat ajunngitsumik toqqissisimanartumillu inuuneqarput. Taakkualu assut qujaffigerusuppakka. Qasusuillutik ullut

tamaasa ilaquttatillu isumassorlugillu aalluttarmatigit.

Qujanaq akisussaaffimmik annertuumik tiguisimagassi, ilaatigut ilissinnut tunulliuttarlusi anguniagaqarassi, siunertamik pitsaasumik. Meeqqavut siunissarpullu pillugit.

Taamaattorli aamma meeraqarpoq inuunerinnerusariaqartunik. Angajoqqaat meeqqaminnut akisussaaffimmik paarsisinnaajunnaarnerannik tunngaveqartartumik.

Ukiunilu kingullerni meeqqat angerlarsimaffii amerliartorput. Angajoqqaajusut akisussaaffimmik paarsisinnaajunnaaraangata ajoraluartumik meeqqat, meeqqat angerlarsimaffiinut inissinneqartarmata.

Tamanna ataatsimoorfigalugu mumisittariaqarparput.
Taamaattussaanngilarmi.

Meeqqat angerlarsimaffii pilersinneqartussaanngikkaluarput, nunattaaku meerai isumassorneqarlutik sikkerartussat - nunannguarput qalipaasersorlugu.

Anguniagassarput tassaavoq, angajoqqaatut paarsisutullu akisussaaffimmik tiguisilluta, meeqqat asanninnermik toqqissisimanermillu tunissallugit.

Angajoqqaatullu tamakkiisumik meeqqaminnik isumassuisinnaajunnaarsimasut tapersorsorlugit, kaammattorlugit, tusarnaarlugit ikorfartorlugillu aqutissiutissagatsigit.

Meeqqat angerlarsimaffimmiit allamut inissinneqartarnerat aaqqiissutitut isiginagu, angajoqqaat meeqqaminnik isumassuilersinnaanissaat, meeqqap inunngornera sioqqullugu tamaviaarullugu aalluttariaqarparput. Meeqqap toqqissisimanartumut inuunermut appakaassinnaanissaa qulakkeerniarlugu. Siunissarpummi pineqarpoq.

Naalackersuisuniit pingaarteqaarput nunatsinni innuttaasut toqqissisimasumik inuuneqarnissaat, tamannalu anguniarlugu assigiinngitsunik suliniuteqarpugut. Inatsisartut qanimut suleqatigalugit aamma toqqammavilersimasatsinnik.

Suliniuterpassuit akornanni ilamerngi oqalugiaatinni iserfigissavakka.

--

Suliniutigaarput nunatsinni sanaartornerup siammasissumik ingerlanneqarnissaa.

Inoqarfinni amerlasuuni sulisartut Nunatta ineriartornerani tunngavileeqataallutik ulappupput. Inuusuttut ilinniartullu inissiassaannik sanaartortoqarluarpoq.

Ukioq manna ukiunilu tulliuttuni inuusuttut arlallit inissaminnut isertersinnaalissapput aammalu ilinnialersussat kisermaat ilaqutaqartullu nutaaliaasunik ilinniarnermi inissaqartinneqassallutik.

Uummannami Kangaatsiamilu inuusuttunut inissiassanik sanaartornissaq pillugu sanaartortussamut isumaqatigiinniarnert ingerlapput, aammattaaq Nuussuarmi, Kangaamiuni, Tasiilami, Qeqertarsuarmi, Nanortalimmi, Upernavimmi Narsamilu inuusuttunut inissialiortitsinissaq pilersaarutaalluni.

Nammineq ineqarluni – nammineq illoqarluni - toqqissisimanarnerpaavoq innuttaasullu amerlanerit taamatut atugaqalernissaat kissaataavoq.

Innuttaasut amerlanerusut nammineq illuliorsinnaanerat pingaartitaraarput taamaattumillu illoqarfinni minnerni aammalu nunaqarfinni illunut sanaqataaffiusunut inatsisip allanngortinnissaanut siunnersuut ukiaq manna ataatsimiinnitsinni oqaluuserineqartussanut ilaavoq.

Nunatsinni innuttaasut sapinngisamik amerlanerpaat inissiamik imminut pilersornissamut periarfissinneqassapput - aamma inoqarfinni minnerni najugaqartut.

Sanaqateqarluni illuliortarnerup, 95/5-imik aamma taaneqartartoq ukiaq manna taamaammat Naalakkersuisut saqqummiunniarpaat. Inatsisip allanngortinnissaanut siunnersuummi innuttaasut najugaqarfinni minnerni najugaqartut aningaaserivimmit taarsigassarsinnaanngitsut ullumikkorniit pitsaanerusumik illumik imminut pilersornissamut periarfissiisoqassaaq.

Nammineq ineqarneq toqqissisimanermik pilersitsisarpoq. Angerlarsimaffiit

kissalaartut tassaapput angerlarsimaffiit toqqissisimanartut. Inuit tamarmik pisinnaatitaaffigisaat toqqissisimaffissaallu.

--

Suliniutigaarput peqqinnissaqarfik toqqissisimanartoq.

Nassuerutissaavoq peqqinnissaqarfimmi suli ilungersunartorsiornerput. Sulisut ulloq unnuarlu sapinngisannguartik tamaat atorlugu ulappupput.

Peqqinnissaqarfiullu iluani kivitassat amerlaqaat.

Peqqinnissaq pillugu Ataatsimiititaliarsuup Isumaliutissiissutini saqqummiussimalerpaa, 100-t sinnerlugit innersuussuteqarfiusumik. Taakku politikikkut isummorsorfigineqartussaapput. Innersuussutit politikikkut oqaluuserineqareerpata ingerlariarfeqqissanik siunnersuuteqartoqassaaq.

Politikkikkullu kissaataasut isumaqatigiissutigalugit siunissamut innuttaasunut toqqissisimanartumik peqqinnissaqarfiup aaqqiissuteqarnissaa maanna piffissanngorpoq.

Peqqinnissaqarfimmi sulisut tapersortariaqarpagut sulilertussallu kaammattortariaqarlutigit.

Suliassammi amerlaqaat.

Peqqinnissaqarfiullu suli nukittorsarneqartariaqarpoq.

Naalackersuisut 2024-mut Aningaasanut Inatsisissamut siunnersuutitsinni ilaatigut siunnersuutigaarput nakorsassarsiornermut 2,8 mio. kr.-it, elektroniskimik napparsimasut allattorsimaffiliornissaq 100 mio. kr.-it kiisalu naartusinnaanngitsut ikiornissaannut ukiumut 8,7 million koruunit illikartinneqassasut.

Tarnimikkut nappaatilinnut immikkoortortaqarfimmik ineriartortitsinissamut pilersaarut ingerlanneqassaaq. Pitsaanerusumik misissuinissamut, paasiaanissamut katsorsaanissamullu suliniutinik ingerlatsissaagut. Meeqqat inuusuttullu tarnimikkut nappaatillit immikkoortortaqarfiat aamma

aallutarineqassaaq.

Aammattaaq sulissutigineqarpoq peqqinnissaqarfimmi aqutsinerup pisariillisarneqarnissaa nukittorsarneqarnissaa. Allaffissornikkut immikkoortortat ikilisarneqarnissaat kiisalu immikkoortortaqaarfimmi pisariaqartitanik sulisoqarnissap qulakkeerneqarnissaa siunertaavoq.

Inuit qitiutillugit sulisariaqarpugut.

Inuit qitiutillugit pilersarusiortariaqarpugut.

Toqqissimasumik inuuneq aamma tassaavoq peqqissumik inuuneqarneq.

--

Suliniutigaarput atuarneq ilinniarnertu qitiutillugit ineriartornissaaq. Kikkummi tamarmik atorfissaqartippagut.

Naalakkersuisut meeqqat inuusuttuaqqallu pingaartippaat.

Anguniagaraarpullu meeqqat qanorluunniit inuunermi atugaqaraluartut ineriartornissaminut atuarnissaminnullu periarfissaqarnissaat.

Naalakkersuisuniit anguniagaraarput atuartut Meeqqat atuarfianniit

anigaangata inuunermi ingerlariaqqillutik ikaarsaarnissaannut

pitsaanerumik tunngavissinneqartarnissaat. Taamaattumik meeqqat

atuarfianni aqutissiuussinerup nukittorsarneqarnissaa anguniagaraarput

toqqaannartumik ilinniarfinnut ikaarsaarnissaat anguniarlugu.

Naalakkersuisuniit anguniagaraarput meeqqat atuarfianniit naammassitut

tamarmik sumut ingerlaqqinnissaat qulakkeerneqartassasoq.

Ilinniarnissaaq pisariaqarlunnarpoq. Ilinniarneq tassaavoq siunissamut

pitsaanerumut tunngavileeqataasartoq. Ilinniarnermi paasisat amerlisarput.

Nunatsinni ilinniagaqarsimassuseq qaffakkiartorpoq tamannalu

nuannaarutissaavoq. Ilinniarnertu kinguneranik atukkat

pitsanngorsaaffigineqartarput inuiaqatigiinnilu naligiinnerulernermik

kinguneqartitsissalluni.

Ilinniarnissamut periarfissat amerlapput taamaakkaluartoq aqutininik nutaanik

ujartuiuaasaagut.

Ilaatigut inuusuttunut immikkut pisariaqartitsisunut naleqqussakkamik ilinniarnermik neqerooruteqalersinnaaneq sulissutigineqarpoq.

Aamma ilinniakkamik aallartitsinissamut aporfiusartut iliuuseqarfigisinnaasagut piarusuppagut. Inuusuttut innarluutillit suliffeqarfinnut naapertuuttumik piginnaanngorsarniarlugit ilinniarnermik pilersitserusuppugut.

--

Suliniutigaarput nunatsinni utoqqalisut pitsaasunik atugaqarnissaat. Utoqqartagut qujassutissaqarfigeqaagut. Utoqqartagut ataqqisassaraagut. Utoqqartagut ilinniarfissaraagut.

Utoqqaallu inuunerat nukittorsarneqassaaq, nunatsinni utoqqalineq pitsaanagerusariaqarmat.

2050-p tungaanut inuiaqatigiit kalaallit inuuneqqortusiartussapput. 1960-ikkunni ukioqatigiiaat amerlasuut tamatumalu kingorna kinguaassiorsinnaanerup apparnera isumaqarpoq, ukiuni tulliuuttuni 20-ni inuiaqatigiinni utoqqaanerusut amerliartussasut.

Ukiut qulit tulliuuttut ingerlaneranni innuttaasut utoqqaat ima amerlatigilissapput, allaat Kalaallit Nunaanni siornatigut misigineqanngisaannarsimalluni.

Tamanna nuannaarutissaavoq ullumikkullu utoqqalisut inuuneqqortunerulernermik angusaq kusanartoq tunngaviligarivaat.

Sulisinnaasut ikilinerattaq isumaqarsinnaavoq, siunissami nunarput sulisussanik amigaateqarnerumaartoq taamaattumillu pissutsinut nutaanut tulluussartariaqarpugut.

Utoqqaat pillugit ataasiinnarmik inatsimmik soqanngilaq, taamaattorli utoqqaat pisinnaatitaaffii inatsisinut amerlasuunut siammaqqapput. Utoqqaat periarfissaat kommunillu periarfissaannut sinaakkutit inatsisini inatsisiliornikkut tunngaveqarput. Inatsisitigut tunngavigisani atuuttuni

malittarisassaqrpoq pisoqalisunik nutarteriffigineqartariaqartunik
tamatumani lu sullissinerup eqaannerusumik allaffissornik innerusumillu
ingerlanneqarsinnaanera siunertarineqassalluni.

Taamaattumik utoqqaat pillugit inatsit ataasiinnanngorlugu suliarineqassaaq.

Utoqqalinersiaqartut amerlasuut utoqqalinersiaqarneq pillugu aaqqissuussaq
ujarlerfigiuminaatsippaat paasiuminaatsillugulu.

Taamaattumik utoqqalinersiaqarneq pillugu nutaamik pisariinnerusumillu
aaqqissuusseqqittoqassaaq.

Naalakkersuisuniit illuatungeriilluni pilersuisussaataitanerup
atorunnaarsinneqarnissaa piviusunngortilerparput. Kiisami!

Inoqutigiinni aappaasup suliffimmi akissarsiaqarnera pissutigalugu,
inoqataasooq utoqqalinersianik ilannganneqartarnera naapertuutinngilaq.
Utoqqalinersiaqarneq pillugu aaqqissuusseqqinnermik sulinnermut atatillugu
pilersuisussaataitaneq atorunnaarsinneqassaaq. Pilersuisussaataitaneq
atorunnaarsinneqarpat innuttaasup kissaatigippagu utoqqalinersiaqalerner
mut ukiorititat kingornagut suliffeqaannarnissaq pilerinarnerulersissavaa
aammalu utoqqalisut ataasiakkaat namminerisamik ataqqinassusiat
nukittorsarneqassalluni. Utoqqalisummi piginnaasarpasui suli inuiaqatigi
inni pisariaqartippagut.

Utoqqartagut toqqissisimasumik inuuneqarnissaat anguniartuassavarput.

Utoqqartagut ukiorpassuit sulereerlutik eqqissillutik inuuneqarnissaat
anguniartuassavarput. Utoqqaat nipaataammaaalajagiinnermi pisariaqarpoq.
Aammalu uagut inersimasunngortut eqqarsaatersuuteqalereerluta utoqqalineq
qanoq ittoq uatsinnut kissaatigineripput.

--

Suliniutigaarput patajaattumik aningaasaqarnissarput.

Toqqissisimanartumik akiliisinnaassuseqarnerup qulakkeerneqarnissaa
siunertaralugu, nunatta karsianit aningaasartuutunik sukangasuumik

eqqarsaatigilluakkamillu atuinermut aqutsineq attatiinnarneqassaaq.

Isumatusaartumik ingerlatsisariaqarpugut. Sulisinnaasut amigaatigaagut taamaattumik siunissaq qaninnerusoq ungasinnerusorlu isigalugu aaqqiissutaasinnaasunik ujartueqatigiissaagut.

Aaqqissuusseqqinnerit tallimat suliarivagut tassaasut:

Ineqarnermik aaqqissuusseqqinneq
Akileraartarnermik aaqqissuusseqqinneq
Peqqinnissaqarfimmik isumaqatigiissuteqarneq
Aalisarnermik inatsimmik isumaqatigiissuteqarneq
Ilinniartitaanermik aaqqissuusseqqinneq
Suliasat tamarmik inuiaqatigiinnut iluaqutaasussaapput taakkulu politikikkut siammasissumik paaseqatigiissutiginnissaat Naalakkersuisuniit pingaartipparput.

--

Suliniutigaarput aalisarneq inuiaqatigiit annerusumik pissarsiffigisassagaat.

Aalisarneq maannakkut unigani ingerlavoq sinerissallu qanittuani aalisarluartoqarpoq.

Aalisarneq nunatsinni inuussutissarsiutit pingaarnersaraat. Avataasiorlunilu aalisarneq aningaasaqarnitsinnut annertuumik kaaviiartitseqataalluinnarpoq.

Immamiit aalisakkanik qaqitsitsisoqartillugu inuppassuarnut sunniuteqartarpoq. Taamaattumik aamma aalisakkat akisussaassuseqartumik atuiffigissavagut.

Tasiilami aalisakkanut fabrikkissaq kiisami piviusunngortussanngorpoq. Suliffissuarmik sanaartorneq aappaagu tamakkiisumik aallartisarneqassaaq, sanaartornerullu aallartinnissaanut qaartitseqqaarneq ukiup naannginnerani pissasoq naatsorsuutigineqarluni. Taamaalilluta pisuussutit tamatta pigisagut siammasissumik iluaqutaanissaat qulakkeerneqarpoq.

2022-mi umiarsuit angallatillu aalisariutit aalisarsinnaanermut akuersissuteqartut 279-iupput.

1.606-it umiatsiaararsorput. Sila pitsaatillugu aalisartorpassuit avalakaasarput aalisariarlutik. Ilaquttatik pilersorumallugit aallakaasarput nunartillu sullikkumallugu.

243-it qimusserlutik aalisariartarput. Suli sikoqartillugu aalisarsinnaapput. Silaannalli kissatsikkiartornera peqqutaalluni sila unerisimajunnaariartorpoq kalaallillu qimmii aamma ikiliartorlutik.

635-t qamuterallalartut aalisarput.

Taakku saniatigut aamma umiatsiaararsortut arlallit sunngiffimmi aalisarsinnaanermut akuersissuteqarput.

Aalisarnermik inuussutissarsiuteqartut annertoorujussuarmik nunatsinni sunniuteqarput. Nunatta ingerlalluarnerannut peqataalluinnarput.

Minnerunngitsunik aalisakkerinerup iluani ilinniarsimasunik pisariaqartitsivugut. Aalisarneq tassaavoq aningaasaqarnikkut nappatigisarput, ukiunilu tulluittuni amerlasuuni taamaattuarallassaaq.

Nunatsinni innuttaasut amerlanngillat taamaattorli aalisartoqarfissuuvoq, tamannalu ilinniartitaanerup piginnaanngorsaanerullu iluani aammalu innuttaasut suliffissaqarniarnerannut ersarinnerusariaqarpoq, takussutissaqarnerusariaqarlunilu. Nunatsinni tasanilu atugassarititaasut kalaallinit namminernit ilisimaneqarneraapput. Nunarput aallaavigalugu inerisaasariaqarpugut taamaattumillu aamma issittumi biologinngorniarluni ilinniartitaanermik pilersitsisoqassasoq siunniunneqarpoq.

Siunissaq ungasinnerusoq isigalugu ilinniartitaaneq pillugu pilersaarusiussaagut.

Ukiorpaalunnilu eqqartorneqartarsimasoq – tassa Aalisarnermut inatsisip nutaap isumaqatigiissuteqarfiginissaa sulissutigaarput.

Aalisarnermut inatsisissap ukiaq manna Inatsisartunut saqqummiunneqannginnera ajuusaarnarluinnarpoq.

Erseqqissaqqillarali Aalisarneq pillugu Inatsisartut inatsisissaat pillugu Naalakkersuisut sulinerat uninngimmat, piaarnerpaamik inatsisartunut isummerfissanngorlugu qaqqinneqarumaarpoq. Naatsorsuutigarpullu Inatsisartut upernaaru ataatsimiilerpata tamanna pisinnaajumaartoq.

Suliarmi Naalakkersuisunit Naalakkersuisooqatigiinniillu qinigaaffik una naammassisassatut pingaartinneqarpoq.

--

Suliniutigaarput inuiaqatigiittut imminut pilersornitta annertusarnissaa.

Pinngortitamut qanilluta inuuvugut. Namminerisamik aalisarneq piniarnerlu ilaqutariit imminnut pilersornissaannut qitiusumik inissisimapput, aammalu kalaalimernit kulturitsinnut kinaassutsitsinnullu pingaaruteqartuupput.

Nunatta pisuussutaanik imminut pilersorneq naalakkersuinikkut salliutinneqarpoq. 2040 nallertinnagu nunatta pisuussutaanik tunisassiornikkut imminut pilersorsinnaanerup annertusitinnissaa siunnerfigalugu sulivugut. Nunatta pisuussutaanik imminut pilersornissamut pilersaarusionerq aallartinneqarpoq, taannalu siunissamut ungasinnerusumut nunatsinni niuernermit periarfissanik pitsannguissamut iluaqutigineqassaaq.

Immitsinnut pilersulernissatsinnut aqut suli takivoq, 2021-imi imminut pilersorsinnaaneq 17 %-inut uuttorneqarpoq.

Assersuutigalugu kujataani naatsiiyanik naatitsisartut pikkorilluinnarput. Nunatsinni naatsiiaqarpugut pitsaalluinnartunik seqqittagaanngitsunillu, aammalumi allaat oqummut akiuussinnaasseqartunik.

Kalaallit naatsiiaat imminut pilersornissamut kalaallillu aningaasaqarnerannut iluaqutaassapput, najukkani sulisartut tapersersussavagut, nioqqutissanik nunanit allaneersunik pinngitsuuisinnaannginnerput annikillissaaq, silap pissusianut sunniutit annikinnerulissapput, kemikaliaqanngillat, aammalu mingutsitsinngitsunut allannguissamut siuarsaataassapput. Najukkatsinneersunik pisigutta tamanna tamatsinnut ilaqutaassaaq aningaasat avammut anninneqaratik nunatsinni kaaviaartussaammata.

Naatsiaat assersuutaannaapput. Taamaattumik imminut pilersornissarput sukataarutigissavarput. Aamma qularinngilara tamatta maani inersuarmitugut tamanna soqutigisarigipput tapersorsorippullu.

--

Suliniutigaarput akisussaassuseqartumik eqqakkanik aqutsinissaq.

Naalakkersuisut pingaartilluinnarpaat pinngortitatsinnit kusanarluinnartumit eqqakkat peerneqarnissaat. Taamaamat suliniuteqassaagut, ataatsimut isigalugu pinngortitamut, avatangiisinut aamma peqqissusermut annerpaanik pissarsiffiusunik.

Ikaarsaariarnermi kommunit qanimut suleqatigissavagut.

Nassuerutigisariaqarpulli maannakkorpiaq eqqagassalerinikkut ikaarsaariarneq sakataarullugu suliarisariaqaratsigu tassanilu ataatsimoorluta kivitseqatigiinnissaq pisariaqarpoq. Akisussaaffik tamatsinniippoq – inoqutigiinni, suliffeqarfinni tamani, kommunini aammalu Namminersorlutik Oqartussani.

Tamatta immikkut pinngortitap nunattalu paarinissaa akisussaaffigaarput. Taamaattumillu immitsinnut uagutsinnullu annerusumik piunaffigisariaqarpugut.

Nunannguarput alianaalluinnartoq eriagalugu paariuassavarput tamannalu ataatsimut kivitseqatigiinnikkut ingerlattuarneqartariaqarluni.

--

Naalakkersuisut nukissiummik nammineq pilersitsinerup annertusarnissaa kissaatigaat. Nunarsuarmit pisut assigiinngitsut nunatsinnut aamma sunniuteqarput taamaattumillu pilersuinermit isumannaatsuunermik annertunerusumik pilersitsisinnaasariaqarpugut.

Nunarput CO₂-mik aniatitsineranik annikillitseqataassaaq kiisalu nunatta silaannarmut mingutsitsinnginnerunissaanut tapeeqataassalluni.

2028-p nalaani innaallagissamik kiassarermillu pilersuinermi nukiit ataavartut 70 %- it missaaniinnissaat naatsorsuutigineqassaaq.

Tamannalu innuttaasut ataasiakkaat aningaasaqarnerannut, inuiaqatigiit aningaasaqarnerannut kiisalu silap pissusianut pitsaasuupput.

Nunatsinni pisuussutinik ulikkaarpugut. Ilaatigut naasaanngiusattorsuarmik imeqarpugut.

Nukissiamik tamanut pilersuineq 2030-imi sapinngisamik annertunerpaartaa nukissiamik ataavartumik tunngaveqartumik pissarsiarineqarsinnaasumik tunngaveqassaaq.

Maannakkumut tallimanik imermik nukissiorfeqarpugut illoqarfinnik arfinilinnik pilersuisuusunik, tassa illoqarfiit Nuuk, Tasiilaq, Qaqortoq, Narsaq, Sisimiut aamma Ilulissat pilersorneqassapput.

Erngup nukinganik innaallagissiorfiliorfissanik suliniutit siunissamut aningaasaliinerupput taamaattumillu Qasigiannugit Aasiaallu eqqaanni erngup nukinganik innaallagissiorfiliornissamik suliniut aamma Utoqqarmiut Kangerluarsunnguanni nukissiorfiup allilerneqarnissaa tullinnguupput.

--

Nuummi Ilulissanilu mittarfiit tallilerneqareerpat, kiisalu Qaqortumi mittarfik pilersinneqareerpat, tassa 2024 aamma 2025-mi nunanut tamalaanut timmisartukkut attaveqarnissanik nutaanik periarfissanik pilersoqassaaq. Naatsorsuutigineqassaaq siunissami ilaasut nassiussallu amerlinissaat.

Nunami tamarmi akunnittarfiit, neriniartarfiit aamma misigisaqartitsisarfiit ineriartortinneqassapput. Aamma ataqatigiissaakkamik pilersaarinermi suliniuteqartoqassaaq, takornariaqarnermi ineriartornerup nunatsinnut tamarmut iluaqutaanissaa tamatumani qulakkeerniarlugu. Tamanna ilaatigut takornariaqarneq pillugu periusissiassap nutaap ineriartornermik taamaattumik tapersersuinissaanut piumasaaqatitaqarpoq, siuariartornissarlu naatsorsuutigineqartoq piujuartitsinermik tunngaveqassasoq, kiisalu nunap ilaani takornariaqarnermik ineriartortitsinissamut sulisut suleqatiginerisigut.

Ukioq manna umiarsuit takornariartaatit nunatsinnut tikittut amerlasuupilussuupput. Aamma tingerlaatillit takussaagaluttuinnarput.

Takornariarneq ajortuunngilaq, soorlu aamma kalaalerpassuusugut nunanut allanut takornariartartugut. Qanorliuna takornariarfigineqarsinnaanerput tikiqqarsinnaanerpullu sinaakkuserluartariaqaleripput.

Angallatit umiarsuillu piniariartarfinnut pulasartut

Takornarissat nuna tiguarlugulusooq ittartut

Takornarissat peqqinnissaqarfimmi inangiisartut - iliuseqarfigisariaqarivut innuttaasunit ujartorneqarmat.

Naalakkersuisut piaartumik sulissutigivaat assigiinngitsutigut aamma inatsisitigut sinaakkusiinissaq siunertaralugu suliaqarnissaq.

Takornariaqarneq aqutaanerusumik ingerlanneqartariaqarpoq.

Takornariarneq nunatsinni najugaqartuusunut aporfilersuisussaangilaq periarfissanilli ammaassisuusariaqarluni.

Uagut aallaavigaluta ilusiligassaraarput. Pisussaaffiliivorlu nammineq utaqqiinnarata sinaakkusiinissatsinnik. Takornariaqarnikkut inerikkiartorneq inuuniutigisinnaasariaqarpoq taamaattorli aamma inooqataaffigisinnaasatsinnik tunngaveqartariaqarluni.

--

Naalakkersuisut inatsisartunilu partiit amerlanerussuteqartut piginnittuuneq pillugu politikkimik nutaamik isumaqatigiissuteqarput.

Inuiaqatigiit kalaallit piginnittuupput taamaattumik ingerlatseqatigiiffiit angusarissarluaraangata tamanna innuttaasunit malugineqartassaaq.

Assersuutigalugu ukioq manna KNI annertuumik immikkut ittumik sinneqartooruteqarpoq, umiarsuarnut takornariartaatinut ikummatissanik tunisinermiit aallaaveqartumik. Immikkut ittumik sinneqartoorutit atuisunut

akigitinneqartunut qaffatsaaliormut atorneqarnissaat Naalakkersuisuniit siunertaarput suliniutigalugulu.

--

Nunasiaataanerup kalunneri iperartariaqarpagut.

Nunarsuarmioqataavugut akisussaaqataajumavugullu taamatullu nammineq pisinnaatitaaffeqarlutalu pisussaaffeqarpugut.

Kikkut suleqatigissanerlugit nalilersortuassavarput.

Nunani Avannarlerni Siunnersuisoqatigiit ilaasortaaffigiinnassanerlugit nalilersussavarput naligiittut inissisimasinnaanerput aallaavigalugu.

Nunarput innuttaasullu pillugit sulissaagut – uagullu maani najugaqartuusugut aqqut toqqammavissarput nammineq ilusilersussavarput.

Innuttaasunik sullissilluarnissarput nunattalu patajaatsumik toqqissisimasumillu najugaqarfigineqarsinnaanera anguniartuassavarput.

Inatsisartuni issiasuusugut sinaakkusiisussaavugut, nunarput inuillu pillugit.

Ataqqinartut Inatsisartunut ilaasortat, ataqqinartut innuttaasut.
Ataatsimoorluta suleqatigiitta.

Siumut isigaluta ingerlasa.

Naleqqanik toraagaqarluta ingerlasa.

Nunarput demokratiskiusumik ingerlatsigu.

Inuit qanimut atassuteqarfigalugit.

Attaviitsut ingiaqatigalugit ingerlasa.

Inuit Ataqtigiissitsigit.

Qujanaq.

Kilde

naalakkersuisut.gl

Kildetype

Digitalt manuskript

Tags

Åbningstale

URI

<https://www.dansketaler.dk/tale/mute-bourup-egede-tale-ved-abningen-af-inatsisartuts-efterarssamling>